



Ulloq: 1. februar 2024  
Allaffik: Nordatlantkontoret  
Sul.suliari: Ketilbjørn Hertz  
Suliap nor: 2023-06736  
Takussutissiaq: 3003299

## Uunga Siunnersuut

Kalaallit Nunaanni eqqartuussisarnermik inatsisip  
allanngortinneqarnera pillugu inatsit  
(Inuit sakkutuujungitsut pillugit eqqartuussivimmi suliat Nunatta  
Eqqartuussisuuneqarfianut innersuunneqarnerat)

### § 1

Inatsisaareersut allannguutaanik eqikkarlugit nalunaarut nr. 1186, 18. september 2023-imeersoq malillugu Kalaallit Nunaanni eqqartuussisarnermik inatsimmi allannguutit tulluuttut suliarineqassapput:

1. § 7, imm. 2-mi oqaaseqatigiinni siullerni, ”suliarinneqqaarfiusutut aalajangiiffigisimasai” kingorna ”imaluunniit § 57 a malillugu innersuunneqarsimasut,” ilanngunneqassaaq.

2. § 7, imm. 2-mi oqaaseqatigiit siulliit kingorna oqaaseqatigiittut nutaatut una: ”Pisuni, § 57 a, imm. 5-imi taaneqartuni tamanna aamma atuuppoq.” ilanngunneqassaaq.

3. § 57-ip kingorna ilanngunneqassaaq:

”§ 57 a. Suliaq pingaarluinnartutut pissuseqarpat aamma inatsisunik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, § 54, nr. 1 malillugu Nunatsinni Eqqartuussiviup akuusumit noqqaassuteqarfigineqarnermigut inuit sakkutuujungitsut pillugit eqqartuussivimmi suliaq Nunatta Eqqartuussisuuneqarfianut suliarisassanngorlugu innersuussinnaavaa.

*Imm. 2.* Suliap najukkami eqqartuussivimmi suliarineqarnissaa imaluunniit Nunatsinni Eqqartuussivimmi suliarineqarnissaa akuusut isumaqatigiissutigisimappassuk, akuusut marluullutik noqqaassuteqarnerisigut, innersuussineq taamaallaat pisinnaavoq.

*Imm. 3.* § 233, imm. 1 malillugu piareersaanerup naammassinnginnerani innersuussinissaq pillugu noqqaassut saqqummiunneqassaaq.

*Imm. 4.* Suliap innersuunneqarnissaa imaluunniit innersuunneqannginnissaa pillugu aalajangiineq, aalajangiinikkut, tunngavilersorneqartussakkut, aalajangerneqassaaq.

*Imm. 5.* Imm. 1-imi innersuussinissamut piumasaaqatit naammassineqarsimanersut, Nunatta Eqqartuussisuuneqarfiata nammineq suliniuteqarnermigut nakkutigissavaa. Piumasaaqatit naammassineqarsimanngippata, eqqartuussisuuneqarfiup suliap suliarinneqqaarfiusutut suliarineqarnissaa itigartissavaa aamma suliap Nunatsinni Eqqartuussivimmut suliareqqitassanngorlugu nassitissallugu. Eqqartuussisuuneqarfiup aalajangiinera, aalajangiinikkut, tunngavilersorneqartukkut, aalajangerneqassaaq.”

**4.** § 59-imi imm. 2-tut ilanngunneqassaaq:

”*Imm. 2.* § 57 a-p malitsigisaanik suliap Nunatsinni Eqqartuussivimmit Nunatta Eqqartuussisuuneqarfianut innersuunneqarsimasut, Nunatta Eqqartuussisuuneqarfiata suliarinneqqaarfiusutut aammattaq suliarissavai.”

**5.** § 60-imi imm. 2-tut ilanngunneqassaaq:

”*Imm. 2.* Suliap Nunatta Eqqartuussisuuneqarfianit suliarinneqqaarfiusutut aalajangiiffiqarsimasut, aamma inatsimmi matumani malittarisassat malillugit aappasaanersumik suliarinniffiusussatut Eqqartuussiviit Qullersaannut saqqummiunneqarsinnaasut, Eqqartuussiviit Qullersaata aammattaq suliarisarpai.”

**6.** § 515, imm. 1-imi oqaaseqatigiinni siullerni, ”Kalaallit Nunaata Eqqartuussisuuneqarfianit” kingorna ilanngunneqassaaq: ”aappasaaneersumik suliarinniffiusussatut”.

**7.** § 515, imm. 2-mi oqaaseqatigiinni siullerni, ”sapaatit akunneri arfineq pingasut” ima allanngortinneqassapput: ”sapaatit akunneri 4”.

**8.** § 515-ip kingorna ilanngunneqassaaq:

”§ 515 a. Eqqartuussutit, Nunatta Eqqartuussisuuneqarfianit suliarinneqqaarfiusutut eqqartuussutit nalunaarutigineqarsimasut, akuusumit, eqqartuussutikkut piunasaqaatigisaminik tamakkiisumik taparserneqanngitsumit, Eqqartuussiviit Qullersaannut naammagittaalliutigineqarsinnaapput.”

9. § 516-imi ”suliarineqarneranut” kingorna ilanngunneqassaaq: ”aallartinneqarneranullu”.

10. § 526, imm. 1-imi, oqaaseqatigiit pingajuattut ilanngunneqassaaq: ”Itigartitsineq pillugu aalajangiineq, Nunatta Eqqartuussisuuneqarfianit § 57 a, imm. 5 malillugu aalajangerneqartoq, Ingerlatitseqqinnissamik aalajangiisartut akuersiteqqaarnagit, Eqqartuussiviit Qullersaannut aalajangeqqitassanngortinneqarsinnaavoq.”

11. § 527-imi ”suliarineqarneranut” kingorna ilanngunneqassaaq: ”aallartinneqarneranullu”.

12. § 527-imi oqaaseqatigiit aappaapput ilanngunneqassaaq: ”Taamaattoq aalajangeqqitassanngortitsinermit piffissaliussaqaq sapaatit akunnerinik 4-nik sivilissuseqarpoq.”

## § 2

*Imm. 1.* Inatsit ulloq 1. juli 2024 atuutilissaaq.

*Imm. 2.* Inatsisip atuutilinnginneranni eqqartuussutitut nalunaarutigineqarsimasunut inatsisip § 1, nr. 7 atuutissanngilaq. Eqqartuussutitut taamaattunut maannamut malittarisassat atuuttut atuutissapput.

*Inatsisissatut siunnersuummut oqaaseqaatit*

*Oqaaseqaatit nalinginnaasut*

**Ujarliutit**

**1. Aallaqqaasiut**

**2. Inuit sakkutuujunngitsut pillugit suliat pingaarluinnartut Nunatta Eqqartuussisuuneqarfianut innersuunneqarnerat**

**2.1. Inatsisit atuuttut**

**2.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq**

**3. Pisortanut aningaasaqarnikkut kingunissai aamma atortuulersitsinermi kingunissaa**

**4. Inuussutissarsiornermut il.il. aningaasaqarnikkut allaffissornikkullu kingunissaa**

**5. Innuttaasunut allaffissornikkut kingunissaa**

**6. Silap pissusaanut tunngasumik kingunissaa**

**7. Avatangiisinut- pinngortitamullu kingunissaa**

**8. EU-mi inatsisitigut tunngassuteqartut**

**9. Oqartussat suleqatigiiffiillu il.il. tusarniaaffigineqartut**

**10. Immersugaq eqikkaaffiusoq**

**1. Aallaqqaasiut**

Naalagaaffeqatigiini Kalaallit Nunaannut naligiimmik, pitsaasumik aamma patajaatsumik peqatigiinnissaq naalakkersuisut kissaatigaat. Kalaallit Nunaat peqatigalugu taamaammat qallunaat akisussaaffii naalakkersuisut ineriartortinniarpaat, ilaatigut suliasaqarfinni, Danmarkip akisussaaffigisaani inatsisiliornerit nutarterneqarnerisigut. Kalaallit Nunaannut inatsisiliornerit, Danmarkip akisussaaffigisaasa, ullumikkumut naleqquttuunissaat aamma pitsaasumik pitsaassuseqarnissaat pingaaruteqarpoq.

Inuit sakkutuujunngitsut pillugit eqqartuussivimmi suliat pingaaruteqarluinnartut inuiaqatigiinnut tunngasumik annertuumik pingaassuseqartut suliarinneqqaarfiusutut nunap eqqartuussisuuneqarfiani suliarineqartarnissaat, Danmarkimi atuuttoq, pillugu Kalaallit Nunaanni

eqqartuussisarnermi periarfissap assinganik ilanngussisoqarnissaa, Naalakkersuisut noqqaassutigisimavaat.

Naalakkersuisut noqqaassutaat Inatsiseqarnermut ministereqarfiup tapersersorsinnaavaa, aamma suliaq pingaarluinnartutut pissuseqarpat aamma inatsisinik atuinermut aamma eqqartuussisutigoortitsinermit suliaasaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, tamanna tunngavigalugu Kalaallit Nunaanni eqqartuussisarnermik inatsimmi akuusup noqqaassuteqarneratigut, inuit sakkutuujunngitsut pillugit suliap Nunatta Eqqartuussisuuneqarfiani suliarinneqqaarfiusutut suliarineqarnissaanut innersuussinissaq pillugu malittarisassamik ilanngussisoqarnissaa siunnersuutigineqarpoq.

Periarfissap pisuni ikittuinnarni atorneqarsinnaanera naatsorsuutigineqarpoq, aamma ingammik malittarisassatut pingaarnertut suliat, tassani qinnuteqartoqarneratigut suliap pingajussaaneersumik suliarinniffiusussatut Eqqartuussiviit Qullersaannut saqqummiunneqarnissaa pillugu, Ingerlatitseqqinnissamik aalajangiisartunit malittarisassat atuuttut malillugit akuersissuteqarfigineqartussatut naatsorsuutigineqartut, pineqartussaapput.

Taamaalilluni Kalaallit Nunaanni inuit sakkutuujunngitsut pillugit suliat immikkut ittumik pingaaruteqarluinnartut aamma inuiaqatigiinnut tunngasumik siunissami pingaarutilimmik kinguneqartussat, aamma pinngitsoornani Eqqartuussiviit Qullersaanni inaarutaasumik aalajangiiffigineqartussatut naatsorsuutigineqarsinnaasut, ullumikkutut suliarinniffiusussani pingasuni suliarineqarnissaannut taarsiullugu, Danmarkimisut siunissami suliarinniffiusussani marlunni suliarineqarsinnaanerat, inatsisissatut siunnersuutip periarfissiisutigaa.

Inatsisissatut siunnersuummi oqaaseqaatini »eqqartuussisarnermik inatsimmut« innersuussisoqarnerani, allatut nalunaaruteqartoqarsimatinnagu Kalaallit Nunaanni eqqartuussisarnermik inatsit innersuussutigineqarmat, maluginiarneqassaaq.

## **2. Inuit sakkutuujunngitsut pillugit suliat pingaarluinnartut Nunatta Eqqartuussisuuneqarfianut innersuunneqarnerat**

### **2.1. Inatsisit atuuttut**

Eqqartuussisarnermik inatsimmi § 57 malillugu, Nunatsinni Eqqartuussivik inuit sakkutuujunngitsut pillugit suliani suliarinneqqaarfiuvoq.

Eqqartuussivimmi suliaq, Nunatsinni Eqqartuussiviup ataani suliarineqartussa, eqqartuussisarnermik inatsimmi § 202 malillugu najukkami eqqartuussivimmi suliarineqarnissaa akuusut isumaqatigiissutigisinnaavaat. Taamaattoq najukkami eqqartuussiviup, isumaqatigiissut taamaattoq apeqqutaatinnagu, suliaq apeqqutinik piviusunik imaluunniit inatsisunut tunngasunik immikkut ittumik ajornakusoortunik tunngassuteqarpat imaluunniit suliaq pingaarluinnartutut pissuseqarpat imaluunniit akuusumut annertuumik akuliunnermik kinguneqassapat, suliaq eqqartuussisarnermik inatsimmi § 56 malillugu Nunatsinni Eqqartuussivimmut innersuussinnaavaa.

Suliat najukkami eqqartuussivimmit imaluunniit Nunatsinni Eqqartuussivimmit suliarinneqqaarfiusutut aalajangiiffigineqarsimasut, aamma eqqartuussisarnermik inatsimmi § 59 malillugu eqqartuussisarnermik inatsimmi malittarisassat malillugit eqqartuussisuuneqarfimmut aappassaaneersumik suliarinniffiusutut saqqummiunneqarsinnaasut, Nunatta Eqqartuussisuuneqarfiata suliarisarpai.

Nunatta Eqqartuussisuuneqarfiani suliat aappassaaneersumik suliarinniffiusutut aalajangiiffigineqarsimasut, aamma eqqartuussisarnermik inatsimmi § 60 malillugu inatsimmi matumani malittarisassat malillugit Ingerlatitseqqinnermut aalajangiisartunit akuersissuteqarnikkut Eqqartuussiviit Qullersaannut pingajussaaneersumik suliarinniffiusussatut saqqummiunneqarsinnaasut, Eqqartuussiviup Qullersaata suliarisarpai.

Suliat immikkut ittumik pissuseqartut Nunatta Eqqartuussisuuneqarfianit suliarinneqqaarfiusutut suliarineqartussaassagaluanginnermut, Kalaallit Nunaanni Eqqartuussiveqarneq pillugu Ataatsimiititaliarsuup isumaliutersuutigisimagaa, eqqartuussisarnermik inatsisip piareersaataasumik suliarineqarnerani takuneqarsinnaavoq, taamaalilluni qallunaat eqqartuussisarnermik aaqquissuussinerat malillugu, Ingerlatitseqqinnissamik aalajangiisartut akuersitinnagit Eqqartuussiviit Qullersaannut naammagittaalliuuteqarneq pisinnaassalluni, tamatumalu kingorna suliat ilaat eqqartuussisuuneqarfinni suliarinneqqaarfiusutut

suliarineqassallutik. Kalaallit Nunaanni eqqartuussiviit suliarinneqqaarfiunerannut immikkut ittumik aaqqissuussineq eqqarsaatigalugu, taamaattoq sulianut ikittuarakasinnut taakkununga, aaqqissuussinerup taamaattup tunngavilersorluagaasinnaanera pillugu ataatsimiititaliarsuaq killiliinissamut aalajangiinermut tunngavimmik naleqquttumik tikkuaasinnaasimanngilaq. Kalaallit Nunaanni eqqartuussiveqarneq pillugu Ataatsimiititaliarsuup isumaliutissiisutaani nr. 1442/2004-imi atuagaq II-mi, qupperneq 237 innersuussutigineqarpoq.

## **2.2. Inatsiseqarnermut ministereqarfiup isumaliutiginninnera aaqqissuussinerlu siunnersuutigineqartoq**

2.2.1. Najukkani eqqartuussiviit aamma Nunatsinni Eqqartuussiviup suliarinneqqaarfiusutut aamma Nunatta Eqqartuussisuuneqarfiata aappassaaneersumik suliarinniffiusussatut aaqqissuunneqarnerat, eqqartuussisarnermik inatsimmi 2008-imeersumi naammassineqarpoq, taannalu 2010-imi atuutilerpoq, kisianni Kalaallit Nunaanni Eqqartuussiveqarneq pillugu ataatsimiititaliarsuup, 2002-mi suliarnik naammassinnittup, siunnersuutaanit tunngaveqarluni. Inuit sakkutuujunngitsut pillugit suliart suliarinneqqaarfiusumik suliarineqartarnerannik najukkani eqqartuussiviup Nunatsinnilu Eqqartuussiviup akornanni agguaneq, inatsit nr. 740, 25. juni 2014-imeersoq malillugu allanngortinneqarpoq, kisianni inatsisip allanngortinneqarnerani tassani illuatungaani najukkani eqqartuussiviit/Nunatsinni Eqqartuussivik illuatungaani Nunatta Eqqartuussisuuneqarfiata akornanni suliart agguarneqarneri attunngilaa.

Danmarkimi sakkutuujunngitsut pillugit eqqartuussivimmi suliassanut suliarinniffiusussat pillugit aaqqissuussineq 2007-imi aaqqissuuteqqinneqarpoq aamma 2014-imi aaqqinneqarluni. Qallunaat aaqqissuussineranni, illoqarfimmi eqqartuussiviup nalinginnaasumik suliarinneqqaarfiusussatut eqqartuussiviunissaa pineqarpoq, kisianni suliart pingaarluinnartutut pissuseqarpat, aamma inatsisinik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, inuit sakkutuujunngitsut pillugit eqqartuussivimmi suliassaq, akuusup noqqaassuteqarneratigut, eqqartuussisuuneqarfimmut suliarinneqqaarfissatut innersuunneqarsinnaavoq.

Naammagittaalliuteqarnermik suliap aalajangiiffigineqarnera Ingerlatitseqqinnissamik aalajangiisartut akuersissuteqarnerisigut Eqqartuussiviit Qullersaannut naammagittaalliutigineqarsinnaappat, inuit sakkutuujunngitsut pillugit illoqarfimmi eqqartuussiviup eqqartuussutaa, killiliinerit ilaat ilaatillugit, eqqartuussisuuneqarfimmut naammagittaalliutigineqarsinnaavoq. Inuit sakkutuujunngitsut pillugit suliameq eqqartuussisuuneqarfiup sularinneqqaarfiusutut eqqartuussusaa kisianni imaaliallaannaq Eqqartuussiviit Qullersaannut naammagittaalliutigineqarsinnaanngilaq.

Folketingstidende 2013-14, A, L 96-imi, saqqummiunneqarsimasumi, qupperneq 3 malillugu, Danmarkimi inuit sakkutuujunngitsut pillugit suliassanut sularinniffiusussat pillugit aaqqissuussinermi tunngaviummik akuusut tassaapput, Eqqartuussiviup Qullersaata suliassaani qitiusutut ilaasut tassaasut ataatsimoorussanik inatsisiliornerup qulakkeerneqarnissaa aamma, suliameq, inatsisilik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartut pillugit apeqqutinik aalajangiisarnera. Kisianni suliameq, taakku inernerisa, uppersaatit pillugit naliliinermik annertuumik tunngaveqartunut, imaluunniit suliassaqarfimmi inatsisilik atuinermi inatsisini malittarisassat inatsisilluunniit aalajangersimasut qanoq nassuiarneqarnissaasa nalornissutigineqarnerisa erseqqissaavigineqareersimanerannik tunngassuteqartunut, aallaaviatigut Eqqartuussiviit Qullersaata isumalluutai atornerqartariaqanngillat.

2.2.2. Inuit sakkutuujunngitsut pillugit eqqartuussiivimmi suliassat immikkut ittumik pingaaruteqarluinnartut aamma inuiaqatigiinnut tunngasumik siunissami pingaarutilimmik kinguneqartussat, Danmarkimi atuuttut, sularinneqqaarfiusutut eqqartuussisuuneqarfimmi innersuunneqartarnissaannut periarfissap assingata Kalaallit Nunaanni eqqartuussisarnermi ilanngunneqarnissaa, Naalakkersuisut noqqaassutigisimavaat.

Naalakkersuisut noqqaassutaat Inatsiseqarnermut ministereqarfiup tapersersorsinnaavaa. Eqqartuussiviit Qullersaat naalagaaffimmut ataatsimoorussamik eqqartuussiviit qullersarimmassuk, aamma aaqqissuussineq ima ilusilerneqassasoq, Eqqartuussiviup Qullersaata isumalluutai suli ataatsimoorussanik inatsisiliornerup qulakkeerneqarnissaa



pillugu aamma, suliani, inatsisinik atuinnermut aamma eqqartuussisutigoortitsinnermut suliassaqqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartut pillugit apeqqutinik aalajangiisarnissat pillugit suliassanut aallussinissamut atorneqarnissaat, Inatsiseqarnermut ministereqarfiup ilaatigut pingaartippaa.

2.2.3. Suliaq pingaaruteqarluinnartutut pissuseqarpat aamma nalinginnaasumik inatsisinik atuinnermut aamma eqqartuussisutigoortitsinnermut suliassaqqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussaappat, akuusup noqqaassuteqarneratigut Kalaallit Nunaanni eqqartuussisarnermik inatsimmi inuit sakkutuujunngitsut pillugit eqqartuussivimmi suliassap sularinneqqaarfiusumik Nunatta Eqqartuussisuuneqarfianut innersuunneqarnissaa pillugu malittarisassamik ilanngussisoqarnissaa tamanna tunngavilalugu siunnersuutigineqarpoq.

Suliat taamaattut, Nunatta Eqqartuussisuuneqarfiani eqqartuussisunit pingasunit sularineqassasut siunnersuutigineqarpoq, taamaalilluni eqqartuussisarnermik inatsimmi § 7, imm. 2 malillugu Nunatta Eqqartuussisuuneqarfia Nunatsinni Eqqartuussivimmut naammagittaalliuuteqartarfiutillugu, Danmarkimiit eqqartuussisuunernit marlunnit sulilersoqartassalluni.

Aaqqissuussinermi Danmarkimisut inuit pillugit eqqartuussivimmi suliassat nalinginnaasut ilaatinneqarnissaat, siunnersuutigineqarpoq. Aaqqissuussinermi ilaatigut ilaqutariit pillugit suliat ilaatinneqassanngillat.

Inuit sakkutuujunngitsut pillugit eqqartuussivimmi suliassat nalinginnaasut ullumikkut sularinneqqaarfiusumik Nunatsinni Eqqartuussivimmi sularineqartarput, aamma akuusup noqqaassuteqarneratigut, Nunatta Eqqartuussisuuneqarfianut innersuussineq pissanersoq pillugu aalajangiineq, Nunatsinni Eqqartuussivimmit aalajangiinikkut, tunngavilersorneqartussakkut, aalajangerneqassasoq siunnersuutigineqarpoq. Eqqartuussisarnermik inatsimmi malittarisassat nalinginnaasut malillugit aalajangiineq Nunatta Eqqartuussisuuneqarfianut aalajangeqqitassanngortinneqarsinnaavoq.

Taassuma saniatigut, qallunaat aaqqissuussineranut naapertuuttumik, Nunatta Eqqartuussisuuneqarfiata nammineq suliniuteqarnermigut, innersuussinermut piumasagaatit naammassineqarsimanersut nakkutigissagai siunnersuutigineqarpoq. Ilaatigut eqqartuussisuuneqarfiit inuit sakkutuujunngitsut pillugit eqqartuussivimmi suliassap eqqartuussisuuneqarfimmi suliarinneqqaarfiusutut suliarineqarnissaat eqqarsaatigalugu, eqqartuussisuuneqarfiit sulisaasiisa naleqquttumik ataqatigiissaarneqarnerisa oqilisaavigineqarnissaat siunertaralugu, eqqartuussiviup innersuussinissamut piumasagaatit naammassineqarsimanerisa nakkutilliinerani, Danmarkimiit eqqartuussisuunerit marluk Nunatta Eqqartuussisuuneqarfiani sulisinneqarnissaat siunnersuutigineqarpoq.

Innersuussinissamut piumasagaatit naammassineqarsimanngitsut Nunatta Eqqartuussisuuneqarfiata aalajangerpagu, aamma taamaammat suliaq Nunatsinni Eqqartuussivimmut utertippagu, eqqartuussisuuneqarfiup tamanna pillugu aalajangiinera, qallunaat aaqqissuussinerannut taamatuttaaq naapertuuttumik, Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaanut aalajangeqqitassanngortinneqarsinnaasoq siunnersuutigineqarpoq.

Inuit sakkutuujunngitsut pillugit suliap suliarinneqqaarfiusumik Nunatta Eqqartuussisuuneqarfiani suliarineqarnissaanut innersuussisarnissaq siunnersuutigineqartoq, Danmarkimi aaqqissuussinerup atuuttup assigaa, aamma qallunaat eqqartuussisarnermik inatsisaanni aalajangersakkap assingata atorneqartarneratut aalajangersagassatut siunnersuutigineqartup atorneqartarnissaa naatsorsuutigineqarpoq.

Inatsisissatut siunnersuummi § 1, nr. 1-imiit 6 ilanngullugu, 8 aamma 10, taakkunungalu oqaaseqaatit innersuussutigineqarput.

2.2.4. Nunatta Eqqartuussisuuneqarfiata eqqartuussutaata, Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaanut naammagittaalliuutigineqarsinnaanera pillugu, nutaatut suliassanngortoqartarnissaa siunnersuutip kinguneraa, aamma Nunatta Eqqartuussisuuneqarfianit eqqartuussisuuneqarfimmut innersuussinerup itigartinneqarnera pillugu aalajangiinerit, Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaanut aalajangeqqitassanngortinneqarsinnaanerat pisinnaassaaq.

Naammagittaalliutit aalajangeqqitassanngortitsinerillu taamaattuut qanoq aallartinneqartassanersut pillugit isummertoqarnissaa taamaamat pisariaqartinneqarpoq, matumani naammagittaalliuuteqarnissamut-aalajangeqqitassanngortitsinissamullu piffissaliussap qanoq innissaa ilanngullugit.

Inuit sakkutuujunngitsut pillugit suliat Eqqartuussiviit Qullersaannut naammagittaalliuutigineqarnissaannut akuersissuteqarnissaq pillugu Ingerlatitseqqinnissamik aalajangiisartunut qinnuteqarnissamut eqqartuussisarnermik inatsisip piffissaliussaa ullumikkut sapaatit akunnerinik 8-nik sivilissuseqarpoq. Piffissaliussap sapaatit akunnerinut 8-nut inissinneqarneranut, kalaallit qallunaallu malittarisassaasa pisariaqanngitsumik assigiinngissuteqarnissaasa pinngitsoortinneqarnissaa pissutaasoq, eqqartuussisarnermik inatsimmi piareersaataasumik suliani takuneqarsinnaavoq, tassami taamanikkut Danmarkimi piffissaliussap assinga sapaatit akunnerinik 8-nik sivilissuseqarpoq (Danmarkimi piffissaliussaq 2014-imi sapaatit akunneri 4-nngorlugit sivikillineqarpoq). Eqqartuussisarnermik inatsit 2008-meersoq, 2010-mi atuutilersoq, sioqqullugu Kalaallit Nunaanni eqqartuussisarnermik inatsit malillugu Ingerlatitseqqinnissamik aalajangiisartunit akuersissummik pissarsinissamut qinnuteqarnissamut piffissaliussaq sapaatit akunnerinik 4-nik sivilissuseqarpoq. Kalaallit Nunaanni Eqqartuussiveqarneq pillugu isumaliutissiissut nr. 1442/2004, atuagaq II, qupperneq 613, innersuussutigineqarpoq.

Inuit sakkutuujunngitsut pillugit suliat Eqqartuussiviit Qullersaannut aalajangeqqitassanngortinneqarnissaannut akuerineqarnissamik Ingerlatitseqqinnissamik aalajangiisartunut qinnuteqarnissamut eqqartuussisarnermik inatsisip piffissaliussaa sapaatit akunnerinik 4-nik sivilissuseqarpoq, taannalu Danmarkimi piffissaliussap assigisaanut sapaatit akunnerinik 2-nnik avaqqutsivoq. Kalaallit Nunaanni allakkat nassiussorneqartarnerat eqqarsaatigalugu piffissaliussaq sapaatit akunnerinut 4-nut inissinneqarsimasoq, eqqartuussisarnermik inatsimmut piareersaataasumik suliani takuneqarsinnaavoq. Kalaallit Nunaanni Eqqartuussiveqarneq pillugu isumaliutissiissut nr. 1442/2004, atuagaq II, qupperneq 615, innersuussutigineqarpoq.

Pingajussaaneersumik suliarinnittoqarnissaa pillugu Ingerlatitseqqinnissamik aalajangiisartut akuersissuteqarsimatillugit, Eqqartuussiviit Qullersaannut naammagittaalliuuteqarnissap imaluunniit

aalajangeqqitassanngortitsinissap aallartinneqarnissaanut piffissaliussamik eqqartuussisarnermik inatsit taasaqanngilaq.

Eqqartuussisarnermik inatsimmi §§ 516 aamma 527 malillugit, taama tulleriillutik, naammagittaalliuuteqarnerup aamma aalajangeqqitassanngortitsinerup Eqqartuussiviit Qullersaanni suliarineqarnissaanut qallunaat eqqartuussisarnermik inatsisaanni malittarisassat, pissutsit assigiinngissuteqarnerisa malitsigisaannik allakkut allannguuteqarlutik, atuunnissaat pillugit eqqartuussisarnermik inatsit malittarisassanik imaqarpoq. Suliaq saqqummiunneqarsimappat, Folketingstidende 2007-08 (katersat aappaat), ilassut A, qupperneq 1521 aamma 1524 malillugit, taama tulleriillutik, naammagittaalliuuteqarnermik suliat aalajangeqqitassanngortitsinermillu suliat Eqqartuussiviit Qullersaanni suliarineqarnissaat pillugit aalajangersakkat taakku malittarisassat aalajangersaraat, eqqartuussisarnermik inatsimmit piareersaataasumik suliani takuneqarsinnaavoq.

Eqqartuussiviit Qullersaanni naammagittaalliuuteqarnermik- aamma aalajangeqqitassanngortitsinermik suliat taamaallaat pinnagit, kisianni aamma Eqqartuussiviit Qullersaannut naammagittaalliuuteqarnermik aamma aalajangeqqitassanngortitsinermik suliat aallartinneqarnissarpiaat pillugit qallunaat eqqartuussisarnermik inatsisaanni malittarisassat, pissutsit assigiinngissuteqarnerisa malitsigisaannik allakkut allannguuteqarlutik, malillugit suliarineqarnerat pissasoq, tamanna tunngavigalugu siunnersuutigineqarpoq.

Malittarisassatut siunnersuutigineqartut malillugit Nunatta Eqqartuussisuuneqarfianit, taama tulleriillutik, eqqartuussutip, aamma Ingerlatitseqqinnissamik aalajangiisartut akuersiteqqaarnagit eqqartuussisuuneqarfiup Eqqartuussiviit Qullersaannut innersuussinissamik itigartitsissuteqarneranik aalajangiinerup, piffissaliussat iluanni aamma Eqqartuussiviit Qullersaannut, taama tulleriillutik, naammagittaalliuuteqarnissaq aamma aalajangeqqitassanngortitsinissaq pillugit qallunaat eqqartuussisarnermik inatsisaanni malittarisassani takuneqarsinnaasuni periutsit malillugit pissasut, siunnersuutip kinguneraa, taamaattoq aalajangeqqitassanngortitsinermi piffissaliussaq pillugu ataaniittoq takuuk.

Ingerlatitseqqinnissamik aalajangiisartut akuersitillugit Eqqartuussiviit Qullersaannut naammagittaalliuuteqarnermi imaluunniit

aalajangeqqitassanngortitsinermi tamanna aamma atuummat, siunnersuutip tamatuma peqatigisaanik kingunerigaa erseqqissarneqarpoq.

Inuit sakkutuujunngitsut pillugit suliap Eqqartuussiviit Qullersaanni pingajussaannersumik suliarinniffiusussatut naammagittaalliorfiginissaanut akuersissummik qinnuteqarnissamut piffissaliussap sapaatit akunnerinik 8-nik sivilissusillip atuuttup, sapaatit akunnerinik 4-nik piffissaliinermut allanngortinneqarnissaa, tassunga atatillugu siunnersuutigineqarpoq. Ingerlatitseqqinnissamik aalajangiisartut akuersissuteqarsimatillugit, qallunaat piffissaliussaannut assingusumut atuuttumut, aamma siunnersuut malillugu naammagittaalliuuteqarnissap aallartinneqarnissaanut piffissaliussamut atuuttussamut, piffissaliussap naapertuuttunngortinneqarnissaa siunnersuummi siunertarineqarpoq. Taaneqareersutut siusinnerusukkut piffissaliussaq aamma sapaatit akunnerinik 4-nik sivilissuseqarsimavoq aamma taamanikkut qallunaat piffissaliussaannut atuuttumut naleqqussarneqarnissaa pissutigalugu taamaallaat sapaatit akunnerinut 8-nut allanngortinneqarsimalluni.

Eqqartuussiviit Qullersaannut aalajangeqqitassanngortitsinissamut piffissaliussaq, Ingerlatitseqqinnissamik aalajangiisartunut aalajangeqqitassanngortitsinissaq pillugu qinnuteqarnissamut piffissaliussap assigisaanik sapaatit akunnerinik 4-nik sivilissuseqassasoq, tamatuma peqatigisaanik siunnersuutigineqarpoq. Tamanna qallunaat eqqartuussisarnermik inatsisaanni aalajangeqqitassanngortitsinermut piffissaliussamut sapaatit akunnerinik 2-nnik avaqqutsineruvoq. Qulaani allassimasut malillugit avaqqutsineq Kalaallit Nunaanni pissutsinik pissuteqarpoq.

Inatsisissatut siunnersuummi § 1, nr. 7, 9, 11 aamma 12, taakkunungalu oqaaseqaatit innersuussutigineqarput.

### **3. Pisortanut aningaasaqarnikkut kingunissai aamma atortuulersitsinermi kingunissaa**

Suliaq pingaarluinnartutut pissuseqarpat aamma inatsisinik atuinermut aamma eqqartuussisutigoortitsinermut suliaasaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, Nunatsinni Eqqartuussiviup akuusumit noqqaassuteqarfigineqarnermigut inuit sakkutuujunngitsut pillugit eqqartuussivimmi suliaq Nunatta

Eqqartuussisuuneqarfianut suliarisassanngorlugu innersuussinnaagaa, inatsisissatut siunnersuutip kinguneraa.

Pisuni ikittuinnarni periarfissap atorneqarnissaa naatsorsuutigineqarpoq, aamma ingammik malittarisassaq pingaarneq malillugu suliat, tassani qinnuteqartoqarneratigut, Ingerlatitseqqinnissamik aalajangiisartut malittarisassat atuuttut malillugit pingajussaaneersumik suliarinniffiusussatut Eqqartuussiviit Qullersaannut saqqummiunneqarnissaannut akuersissuteqarsimanera naatsorsuutigineqartariaqarluni.

Tamanna tunngavigalugu Kalaallit Nunaannit Eqqartuussiviit Qullersaanni inuit sakkutuujunngitsut pillugit suliat naammagittaalliuutigineqarnerisa uuttortarneqarsinnaasumik amerlinerinik inatsisissatut siunnersuut kinguneqartussaannngitsutut naatsorsuutigineqarpoq.

Aammattaaq suliat, ullumikkut Nunatta Eqqartuussisuuneqarfianut qanorluunniit naammagittaalliuutigineqarsinnaasut, Nunatsinni Eqqartuussivimmi suliarineqartussaagaluartut pineqartussaapput, taakkunani inatsisit atuuttut malillugit eqqartuussisuunerit pingasut suliap eqqartuussisuuneqarfimmi suliarineqarnerani aamma peqataasussaasimagaluarlutik.

Suliarinneqqaarfimmi eqqartuussineq naammagittaalliornermik suliamut naleqqiullugu suliaqarnerunermik piumasaqaateqarfiusinnaannera pissutigalugu, inatsisissatut siunnersuutip tamanna tunngavigalugu Nunatta Eqqartuussisuuneqarfiani taamaallaat killilimmik suliassat amerlinissaannik kinguneqarnissaa naatsorsuutigineqarpoq, tamannali Nunatsinni Eqqartuussivimmut assigisaannik oqilisaassinermik illuatungeqassaaq, taannami suliat pineqartut pillugit suliarinneqqaarfiusutut suliaqartarunnaartussaassammat.

Suliat attorneqartussat ikittuarakasiunissaat pillugit naatsorsuuteqarneq isiginiarlugu, Nunatsinni Eqqartuussivimmi, Nunatta Eqqartuussisuuneqarfiani aamma Eqqartuussiviit Qullersaanni tamanna pillugu innersuussinissamik aalajangeeqqittoqarnissaanillu noqqaassutit suliarineqarnissaasa taamatuttaaq ikittuinnaanissaat naatsorsuutigineqarpoq.

Ataatsimut isigalugu inatsisissatut siunnersuutip naalagaaffimmut aningaasaqarnermut imaluunniit atortuulersitsinermit tunngasunik annertuumik kinguneqarnissaa naatsorsuutigineqanngilaq.

Inatsisissatut siunnersuut aningaasaqarnermut imaluunniit atortuulersitsinermit tunngasunik kommuninut kinguneqassanngilaq.

#### **4. Inuussutissarsiornermut il.il. aningaasaqarnikkut allaffissornikkullu kingunissaa**

Suliat pingaarluinnartutut pissuseqartut aamma inatsisinik atuinermut aamma eqqartuussisutigoortitsinermit suliaasaqarfimmi ineriartornermut imaluunniit allakkut inuiaqatigiinnut tunngasunik pingaarutilimmik kinguneqartussatut nalinginnaasumik pingaassuseqartut, aamma pinngitsoorani Eqqartuussiviit Qullersaanni inaarutaasumik aalajangiiffigineqarnissaat naatsorsuutigineqartut, ullumikkutut suliarinniffiusartuni pingasuni suliarineqaratik, suliarinniffinni marlunni suliarineqarsinnaalernerat, inatsisissatut siunnersuutip periarfissippaa.

Inuit sakkutuujunngitsut pillugit suliani eqqartuussivimmi pingaarluinnartutut pissuseqartuni aamma inatsisinik atuinermut aamma eqqartuussisutigoortitsinermit suliaasaqarfimmi ineriartornermut imaluunniit allakkut inuiaqatigiinnut tunngasunik pingaarutilimmik kinguneqartussatut nalinginnaasumik pingaassuseqartuni, suliat taamaattut pillugit suliffeqarfinnut ikittuinnaasunut akuusunut, tamanna allaffissornikkut aningaasaqarnikkullu oqilisaavigineqarnermik kinguneqassaaq.

#### **5. Innuttaasunut allaffissornikkut kingunissaa**

Inatsisissatut siunnersuut innuttaasunut allaffissornikkut kinguneqanngilaq.

#### **6. Silap pissusaanut tunngasunik kingunissaa**

Inatsisissatut siunnersuut silap pissusaanut- aamma avatangiisinut kinguneqassanngilaq.

#### **7. Avatangiisinut- pinngortitamullu kingunissaa**

Inatsisissatut siunnersuut avatangiisinut- pinngortitamullu kinguneqassanngilaq.

### 8. EU-mi inatsisitigut tunngassuteqartut

Inatsisissatut siunnersuut EU-mi inatsisitigut tunngasunik isiginniffinnik imaqanngilaq.

### 9. Oqartussat suleqatigiiffiillu il.il. tusarniaaffigineqartut

Inatsisissatut siunnersuummut missingiut piffissami ulloq [\*] 2023-imiit ulloq [\*] 2023-imut oqartussaasunut suleqatigiiffinnullu il.il. tulliuttuni tusarniutigalugu nassinneqarpoq:

[\*]

### 10. Immersugaq eqikkaaffiusoq

	Pitsaasumik sunniutissai/aningaasartuutikinnerunerit (angeruit, annertussusaa allaguk/Naaggaaruit allaguk »Soqanngilaq«)	Ajortumik sunniutissai/aningaasartuu- teqarnerunissaq (angeruit, annertussusaa allaguk/Naaggaaruit allaguk »Soqanngilaq«)
Naalagaaffimmut, kommuninut nunallu immikkoortuinut aningaasaqarnikkut kingunissaa	Soqanngilaq	Pingaartilinnik soqanngilaq
Naalagaaffimmut, kommuninut nunallu immikkoortuinut atuutilersitsinerup kingunissaa	Soqanngilaq	Pingaartilinnik soqanngilaq
Inuussutissarsiortunut aningaasaqarnikkut kingunissaa	Inuit sakkutuujunngitsut pillugit suliani eqqartuussivimmi pingaarluinnartut pissuseqartuni aamma inatsisinik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut	Soqanngilaq



	tunngasumik pingaarutilimmik kinguneqartussatut nalinginnaasumik pingaassuseqartuni, suliat taamaattut pillugit suliffeqarfinnut ikittuinnaasunut akuusunut, tamanna aningaasaqarnikkut oqilisaavigineqarnermik kinguneqassaaq.	
Inuussutissarsiortunut allaffissornikkut kingunissaa	Inuit sakkutuujunngitsut pillugit suliani eqqartuussivimmi pingaarluinnartutut pissuseqartuni aamma inatsisinik atuinermut aamma eqqartuussisutigoortitsinermut suliasaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartuni, suliat taamaattut pillugit suliffeqarfinnut ikittuinnaasunut akuusunut, tamanna allaffissornikkut oqilisaavigineqarnermik kinguneqassaaq.	Soqanngilaq
Innuttaasunut allaffissornikkut kingunissaa	Soqanngilaq	Soqanngilaq
Silap pissusaanut tunngatillugu kingunissaa	Soqanngilaq	Soqanngilaq
Avatangiisinut-pinnngortitamullu kingunissaa	Soqanngilaq	Soqanngilaq
EU-mi inatsisitigut tunngassuteqartut	Inatsisissatut siunnersuut EU-mi inatsisitigut tunngasunik isiginniffinnik imaqanngilaq.	
EU-mi inuussutissarsiornermut sammititamik malittarisassiornermi tunngaviusut tallimaasut atortuulersinneqarnissaannut akerliuvoq/EU-mi malittarisassiuinermi minnerpaamik piumasaaqatinik qaangiivoq	App	Naagga X

(X-ileruk)	
------------	--

*Inatsisissatut siunnersuummi aalajangersakkanut ataasiakkaat oqaaseqaatit*

*§ 1-imut*

Nr. 1-imut 2-mullu

Eqqartuussisarnermik inatsimmi § 7 Nunatta Eqqartuussisuuneqarfiata katitigaaneranut tunngassuteqarpoq.

Nunatta Eqqartuussisuuneqarfia eqqartuussisuunermik ataatsimik eqqartuussisuuneqartoq, aamma suliani Nunatsinni Eqqartuussivimmit suliarinneqqaarfiusumik aalajangiiffigineqarsimasuni, pingaarnertut isumaqatigiinniarnertup nalaani Danmarkimit eqqartuussisuunernik 2-nnik sulisulerneqartassasoq, § 7, imm. 1-imi aamma 2-mi takuneqarsinnaavoq. Pingaarnertut isumaqatigiinniarnertup nalaani eqqartuussisuuneqarfik Danmarkimit eqqartuussisuunernik suli 2-nnik sulisitaqassanersoq, Nunatta Eqqartuussisuuneqarfiani eqqartuussisuunerup, eqqartuussiviup siulittaasorisaata, aalajangersinnaavaa.

*§ 7, imm. 2-mi oqaaseqatigiinni siullerni* “aalajangiiffigisimasai” kingorna “imalunniit § 57 a malillugu innersuunneqarsimasut” ilanngunneqassasoq siunnersuutigineqarpoq.

Inatsisissatut siunnersuummi § 1, nr. 3 malillugu, suliami, § 57 a-tut siunnersuutigineqartup malitsigisaanik, eqqartuussisuuneqarfimmut suliarinneqqaarfiusutut innersuunneqarsimasumi, pingaarnertut isumaqatigiinniarnertup nalaani, Nunatta Eqqartuussisuuneqarfia Danmarkimit eqqartuussisuunernik 2-nnik sulisitsissasoq, siunnersuutip kinguneraa.

*§ 7, imm. 2-mi oqaaseqatigiit siulliit* kingorna, oqaaseqatigiinnik nutaanik ilanngussisoqassasoq siunnersuutigineqarpoq, tamatumalu kingorna pisuni § 57 a, imm. 5-imi taaneqartuni, tamanna aamma atuutissaaq.

Nunatsinni Eqqartuussiviup inuit sakkutuujunngitsut pillugit suliamik eqqartuussisuuneqarfimmut innersuussineranut atatillugu, eqqartuussisuuneqarfiup § 57 a, imm. 5-itut siunnersuutigineqartoq malillugu, innersuussinissamut piumasagaatit

naammassineqarsimanerannik nakkutiginninnerani, taamatuttaaq Nunatta Eqqartuussisuuneqarfia Danmarkimit eqqartuussisuunernik 2-nnik sulisitsissasoq, siunnersuutip kinguneraa. § 57, imm. 5 malillugu aalajangiineq allattariarsornikkut aalajangerneqartussaammat, pisuni taakkunani Danmarkimit eqqartuussisuunerit Kalaallit Nunaannut aallarnissaat pisariaqassanngilaq. Kalaallit Nunaanni Danmarkimillu eqqartuussisuunerit akornanni taasinerit nalunaarasuartaatikkut attaveqatigiinnikkut, oqarasuaatikkut attaveqatigiinnertut imaluunniit video atorlugu ataatsimiinnertut ilusilittut aamma/imaluunniit allattariarsornikkut naammassineqarsinnaassaaq.

Folketingstidende 2013-14, A, L 96 saqqummiunneqarsimasoq, qupperneq 6 aamma 10 malillugit, eqqartuussisuuneqarfinni sulianik suliarinnittarneq ima aaqqissuunneqassasoq, taamaalilluni eqqartuussisuuneqarfimmut innersuussinerit ataqatigiissaarneqarnerisa annertusarneqarnissaat siunertaralugu, suliassat innersuunneqartut tiguneqarnerminni eqqartuussisuuneqarfinni tamani immikkoortortami assingusumi nalunaarsorneqartassasut, qallunaat eqqartuussisarnermik inatsisaata piareersaataasumik suliarineqarnerani naatsorsuutigineqarpoq. Piareersaataasumik suliani naatsorsuutigineqartut malillugit eqqartuussisuuneqarfiit innersuussisarnermik aaqqissuussinermik ingerlatsisut, Østre aamma Vestre Landsret-it 2023-imi oktoberimi ilisimatitsissutigaat. § 57 a, imm. 5 malillugu aalajangiinerni Nunatta Eqqartuussisuuneqarfiani Danmarkimit eqqartuussisuunernik ivertitsinermi, eqqartuussisuunerit pineqartut eqqartuussisuuneqarfimmut innersuussinernut Østre aamma Vestre Landsret-imut innersuussisarnernut sulisaatsip Nunatta Eqqartuussisuuneqarfianut sulisaatsimut ataqatigiissaarneqarnissaata annertusineqarnissaa siunertaralugu aaqqissuunneqassasoq, tamanna tunngavigalugu naatsorsuutigineqarpoq, taamaalilluni Nunatta Eqqartuussisuuneqarfianut innersuussisarneq pillugu aalajangersagassatut siunnersuutigineqartoq, qalunaat eqqartuussisarnermik inatsisaanni aalajangersakkap assingata atorneqarnera assigalugu atorneqartarnissaa qulakkeerneqassammat. Tamanna ilaatigut qallunaat eqqartuussisarnermik inatsisaanni § 226, imm. 5 malillugu aalajangiinerni assingusuni peqataasimasut akornannit tamakkiisumik ilaannakoortumilluunniit ivertitsisoqarneratigut pisinnaavoq, imaluunniit eqqartuussisuunernik Østre aamma Vestre Landsret-ip eqqartuussisuuneqarfimmut innersuussisarneq pillugu naqinninngorlugu allatamik aamma naqinninngorlugu allataanngitsumik sulisaasianik allakkut ilisimasalinnik ivertitsinikkut pisinnaalluni.

Matumuuna Danmarkimi eqqartuussisuuneqarfimmut innersuussisarnerit pissuseqataanik Nunatta Eqqartuussisuuneqarfianut innersuussinerit ataqatigiissaarneqarnerisa annertusarniarneqarnerat siunertarineqarpoq.

Inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 3-mut

Eqqartuussisarnermik inatsimmi § 57 a-tut aalajangersakkamik nutaamik ilanngussisoqarnissaa siunnersuutigineqarpoq, taassumalu inuit sakkutuujunngitsut pillugit suliaq Nunatsinni Eqqartuussivimmit Nunatta Eqqartuussisuuneqarfianut innersuunneqartarnera pillugu malittarisassat imarai.

Suliaq pingaarluinnartutut pissuseqarpat aamma inatsisunik atuinermut aamma eqqartuussisutigoortitsinermit suliaq eqqartuussivimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, § 54, nr. 1 malillugu Nunatsinni Eqqartuussiviup akuusumit noqqaassuteqarfigineqarnermigut inuit sakkutuujunngitsut pillugit eqqartuussivimmi suliaq Nunatta Eqqartuussisuuneqarfianut suliarisassanngorlugu innersuussinnaagaa, imm. 1-imi siunnersuutigineqarpoq.

Inuit sakkutuujunngitsut pillugit eqqartuussivimmi suliaq, Nunatsinni Eqqartuussivimmi suliarineqartoq, piumasaqaatit taaneqartut naammassineqarsimatillugit, akuusup noqqaassuteqarneratigut suliarinneqqaarfiusutut Nunatta Eqqartuussisuuneqarfianut suliarisassanngorlugu innersuunneqarsinnaasoq, siunnersuutip kinguneraa.

Inuit sakkutuujunngitsut pillugit eqqartuussivimmi suliat, eqqartuussisarnermik inatsimmi § 54, nr. 1-imi taaneqartut, siunnersuummi ilaatinneqarput. Eqqartuussisarnermik inatsimmi § 57, imm. 2 malillugu inatsisip, inatsisartut inatsisaata imaluunniit inatsisartut peqqussutaata malitsigisaannik Nunatsinni Eqqartuussivimmi suliarinneqarfiusussatut inissinneqartunut tamanna aamma atuuppoq. Kisianni eqqartuussisarnermik inatsimmi § 54, nr. 3-miit 6 ilanngullugu taaneqartutut assersuutigalugu aappariinneq- aamma angajoqqaatut oqartussaataaneq, ataataassarsiuinerlu pillugit suliat, nammineersinnaassusiiagaanernut aamma

angajoqqaatut akisussaaitaasumik isumasiueqqaarluni pisuussutit pillugit aalajangiisinnaaneq pillugit suliat imaluunniit pigisanik agguaassinermik suliassat siunnersuummi ilaatinneqanngillat.

Minnerpaamik akuusoq ataaseq eqqartuussisuuneqarfimmut innersuunneqarnissamik noqqaassuteqassasoq piumasaqaataavoq, kisianni akuusut arlaata eqqartuussisuuneqarfimmut innersuussisoqarnissaa pillugu kissaatigisaqarnersut eqqartuussiviup nammineq suliniuteqarnermigut apeqqutigisinnaavaa. Pisuni innersuussineq ataatsimoorussamik noqqaassuteqarnermik piumasaqaatitalik pillugu, imm. 2-tut siunnersuutigineqartoq pillugu oqaaseqaatit ataaniittut innersuussutigineqarput.

Suliat pingaarluinnartutut pissuseqarnissaa aamma taassuma saniatigut inatsisinik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarnissaa, innersuussinermut piumasaqaataavoq.

Inuit sakkutuujunngitsut pillugit eqqartuussivimmi suliat illoqarfimmi eqqartuussivimmit eqqartuussisuuneqarfimmut innersuunneqarnerat pillugu qallunaat eqqartuussisarnermik inatsisaanni § 226, imm. 1-imi paasinneriaatsip assinganik aalajangersagaq paasineqassaaq.

Suliat “pingaarluinnartutut pissuseqartut” ingammik tassaapput suliat, inatsisip nassuiarneqarneranut tunngassuteqartut, imaluunniit allakkut apeqqummik pingaarluinnartumik eqqartuussivimmik akuliutsitsinermut tunngassuteqartut. Suliat pingaarluinnartutut pissuseqartut avataanniippat assersuutigalugu suliat, annerusumik uppersaasarsuineq piviusuusoq tunngavigalugu naliliinermik aalajangerneqartussat imaluunniit pissutaaqataasut arlallit missiliuinikkut missingersuunneqartussat, tassani missingersuineq annertuumik kinguneqartussaanani.

Suliaq pingaarluinnartutut pissuseqarnermi saniatigut aamma inatsisinik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, innersuussineq taamaallaat pisinnaavoq. Pissutsit assigiinngitsut malillugit, missiliuussinertut ilisarnaatilimmik naliliineq pineqassaaq, tassani ingammik Eqqartuussiviit Qullersaata atuuffiata qulakkeerneqarnissaa

pillugu eqqartuussiviit aaqqissuussivigeqqinneqarneranni suliaq pissutsimigut qulakkeerinnissinnaanersoq, aamma taamaammat immikkut ittumik akuersissummik peqqaarani, Eqqartuussiviit Qullersaannut aappassanneersumik suliarinniffiusussatut saqqummiunneqarsinnaasariaqarnersoq, tassani naliliinermi ilaatinneqassapput.

Suliap najukkami eqqartuussivimmi imaluunniit Nunatsinni Eqqartuussivimmi suliarineqarnissaa akuusut isumaqatigiissutigisimappassuk, innersuussineq taamaallaat akuusut tamarmik noqqaassuteqarnerisigut pisinnaasoq, *imm. 2-mi* siunnersuutigineqarpoq.

Suliap najukkami eqqartuussivimmi imaluunniit Nunatsinni Eqqartuussivimmi suliarineqarnissaa akuusut siusinnerusukkulli isumaqatigiissutigisimappassuk, aalajangersagassatut siunnersuutigineqartoq malillugu Nunatta Eqqartuussisuuneqarfianut innersuussineq akuusut marluullutik noqqaassuteqarnerisigut taamaallaat pisinnaasoq, siunnersuutip kinguneraa. Suliapi, akuusut akornanni inatsisitigut pissutsit pillugit taamaattoqassappat suliaq najukkami eqqartuussivimmi imaluunniit Nunatsinni Eqqartuussivimmi suliarineqassasoq suliap aallaqqaataanili suliarineqalinnginneranili isumaqatigiissutigineqarsimaneranni pisut aamma ilaatinneqarput.

Suliap Nunatsinni Eqqartuussivimmi ingerlanneqarnerani, aalajangersagassatut siunnersuutigineqartoq malillugu Nunatta Eqqartuussisuuneqarfianut innersuussineq taamaallaat pisinnaavoq. Eqqartuussisarnermik inatsimmi § 202 malillugu suliap najukkami eqqartuussivimmi suliarineqarnissaa akuusut isumaqatigiissutigisimappassuk, eqqartuussisarnermik inatsimmi § 56 malillugu najukkami eqqartuussiviup tamanna sioqqullugu Nunatsinni eqqartuussivimmut suliaq innersuussimappagu, Nunatta Eqqartuussisuuneqarfianut innersuussinissaq pillugu apeqqut saqqummersinnaavoq.

§ 223, *imm. 1* malillugu innersuussinissamik noqqaassuteqarneq piareersaanerup naannginnerani saqqummiunneqassasoq, *imm. 3-mi* siunnersuutigineqarpoq.

Eqqartuussisarnermik inatsimmi § 233, imm. 1 malillugu piareersaaneq naatinnagu, akuusooq – imaluunniit imm. 2-mi pisuni taaneqartuni, akuusut marluullutik – tamanna noqqaassutigippagu/noqqaassutigippasuk, aalajangersagassatut siunnersuutigineqartoq malillugu suliaq taamaallaat Nunatta Eqqartuussisuuneqarfianut saqqummiunneqarsinnaasooq, siunnersuutip kinguneraa.

Suliaq innersuunneqassanersoq imaluunniit innersuunneqassannginnersooq pillugu aalajangiineq, aalajangiinikkut tunngavilersorneqartussakkut aalajangerneqassasooq, *imm. 4-imi* siunnersuutigineqarpoq.

Akuusup imaluunniit akuusut suliap Nunatta Eqqartuussisuuneqarfianut innersuunneqarnissaa pillugu noqqaassuteqarnera imaluunniit noqqaassuteqarnerat pillugu Nunatsinni Eqqartuussivik akuersippat imaluunniit akuersissuteqanngippat, eqqartuussiviup aalajangiinera tunngavilersuutitik ilaqartinneqassasooq, siunnersuutip kinguneraa.

Imm. 1-imi innersuussinissamut piumasaqaatit naammassineqarsimanersut, Nunatta Eqqartuussisuuneqarfiata nammineq ingerlatsinermigut nakkutigissagaa, *imm. 5-imi* siunnersuutigineqarpoq. Piumasaqaatit naammassineqarsimangippata, eqqartuussisuuneqarfiup suliap suliarinneqqaarfiusutut suliarineqarnissaa itigartitsissutigissavaa aamma suliaq Nunatsinni Eqqartuussivimmi suli suliarineqarnissaanut nassitussallugu. Eqqartuussisuuneqarfiup aalajangiinera aalajangiinikkut tunngavilersorneqartussakkut aalajangerneqassaaq.

Eqqartuussiviit Qullersaata atuuffiatut suliassaattullu anguniakkat anguneqarnissaasa qulakkeernissaannut, suliat aappassaaneersumik suliarinniffiusussatut Eqqartuussiviit Qullersaannut saqqummiunneqarsinnaasutut naleqqunnersut tunngavilersorniarlugu, Nunatta Eqqartuussisuuneqarfiata nammineq ingerlatsinermigut innersuussinissamut piumasaqaatit naammassineqarsimanerat nakkutigissagaa, siunnersuutip kinguneraa. Innersuussinissamut piumasaqaatit naammassineqarsimangippata, eqqartuussisuuneqarfiup tamatuma kingorna Nunatsinni Eqqartuussivimmit Nunatta Eqqartuussisuuneqarfianut innersuussineq itigartissavaa.

Inatsisissatut siunnersuummi § 1, nr. 10 malillugu itigartitsineq taamaattoq Ingerlatitseqqinnissamik aalajangiisartunik akuersissummik peqqaarani Eqqartuussiviit Qullersaannut



aalajangeqqitassanngortinneqarsinnaasariaqartoq, tassunga atatillugu siunnersuutigineqarpoq.

Inatsisissatut siunnersuummi § 1, nr. 2 malillugu pisuni imm. 5-itut siunnersuutigineqartumi taaneqartuni, Nunatta Eqqartuussisuuneqarfia Danmarkimit eqqartuussisuunernik 2-nnik sulisitsissasoq siunnersuutigineqarpoq. Imm. 5-itut siunnersuutigineqartup malitsigisaanik, Nunatta Eqqartuussisuuneqarfiata innersuussinissamut piumasqaatit naammassineqarsimanerannik nakkutiginninnermini, eqqartuussisuuneqarfiup Danmarkimit eqqartuussisuunerit 2 sulisissagai, tamatuma kinguneraa. Kalaallit Nunaanni Danmarkimillu eqqartuussisuunerit akornanni taasinerit nalunaarasuartaatikkut attaveqatigiinnikkut, oqarasuaatikkut attaveqatigiinnertut imaluunniit video atorlugu ataatsimiinnertut ilusilittut aamma/imaluunniit allattariarsornikkut naammassineqarsinnaassaaq.

Inatsisissatut siunnersuummi § 1, nr. 2 malillugu § 57 a, imm. 5 malillugu aalajangiinerni Nunatta Eqqartuussisuuneqarfiani Danmarkimit eqqartuussisuunernik ivertitsinerimi, eqqartuussisuunerit pineqartut eqqartuussisuuneqarfimmut innersuussinernut Østre aamma Vestre Landsret-imut innersuussisarnernut sulisaatsip Nunatta Eqqartuussisuuneqarfianut sulisaatsimut ataqatigiissaarneqarnissaata annertusineqarnissaa siunertaralugu aaqqissuunneqassasoq, tamanna tunngavigalugu naatsorsuutigineqarpoq, taamaalilluni Nunatta Eqqartuussisuuneqarfianut innersuussisarneq pillugu aalajangersagassatut siunnersuutigineqartoq, qalunaat eqqartuussisarnermik inatsisaanni aalajangersakkap assingata atorneqarnera assigalugu atorneqartarnissaa qulakkeerneqassammat.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 4-mut

Nunatta Eqqartuussisuuneqarfiata suliassai eqqartuussisarnermik inatsimmi § 59-ip aalajangersarpai. Suliat sularinneqqaarfiusumik najukkami eqqartuussivimmit imaluunniit Nunatsinni Eqqartuussivimmit aalajangiiffigineqarsimasut, aamma eqqartuussisarnermik inatsimmi malittarisassat malillugit eqqartuussisuuneqarfimmut aappassaaneersumik sularinniffiusussatut saqqummiunneqarsinnaasut, Nunatta

Eqqartuussisuuneqarfiata suliarissagai, aalajangersakkami takuneqarsinnaavoq.

§ 59-imi nutaatut imm. 2-mik ilanngussisoqarnissaa siunnersuutigineqarpoq, tamatumalu kingorna suliat, § 57, a-p malitsigisaanik Nunatsinni Eqqartuussivimmit Nunatta Eqqartuussisuuneqarfianut suliarinneqqaarfiusussat innersuunneqartut, Nunatta Eqqartuussisuuneqarfiata aammattaaq suliarissavai.

Inatsisissatut siunnersuummi § 1, nr. 3 malillugu, § 57 a-tut siunnersuutigineqartup malitsigisaanik, inuit sakkutuujunngitsut pillugit eqqartuussivimmi suliat Nunatsinni Eqqartuussivimmit Nunatta Eqqartuussisuuneqarfianut innersuunneqartut, Nunatta Eqqartuussisuuneqarfianit suliarineqarsinnaaneratt siunnersuutip periarfissaliissutigaa.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 5-imut

Kalaallit Nunaanni eqqartuussisarnerup iluani Eqqartuussiviit Qullersaata suliassaatt eqqartuussisarnermik inatsimmi § 60-ip aalajangersarpai. Suliat Nunatta Eqqartuussisuuneqarfianit aappassaaneersumik suliarinniffiusutut aalajangiiffigineqarsimasut, aamma eqqartuussisarnermik inatsimmi aalajangersakkat malillugit Ingerlatitseqqinnissamik aalajangiisartut akuersissuteqarnerisigut Eqqartuussiviit Qullersaannut saqqummiunneqarsinnaasut, Eqqartuussiviit Qullersaata suliarissagai, aalajangersakkami takuneqarsinnaavoq.

§ 60-imi nutaatut imm. 2 ilanngunneqassasoq siunnersuutigineqarpoq, tamatumalu kingorna suliat, Nunatta Eqqartuussisuuneqarfianit suliarinneqqaarfiusumik aalajangiiffigineqarsimasut, aamma eqqartuussisarnermik inatsimmi malittarisassat malillugit Eqqartuussiviit Qullersaannut saqqummiunneqarsinnaasut, Eqqartuussiviit Qullersaata aammattaaq suliarissavai.

Inuit sakkutuujunngitsut pillugit naammagittaalliornerit- aamma aalajangeqqitassanngortitsinerit, inatsisissatut siunnersuummi § 1, nr. 8 aamma 10 malillugit, § 515 a-tut aamma § 526, imm. 1-mi oqaaseqatigiit

pingajuattut siunnersuutigineqartut malitsigisaannik  
Ingerlatitseqqinnissamik aalajangiisartut akuersiteqqaarnagit Nunatta  
Eqqartuussisuuneqarfianit Eqqartuussiviit Qullersaannut  
suliassanngorteqqinneqartut, Eqqartuussiviit Qullersaanit  
suliarineqarsinnaanerat, siunnersuutip periarfissaliissutigaa.

Aammattaaq inatsisissatut siunnersuummi nalinginnaasumik oqaaseqaatini  
imm. 2.2 innersuussutigineqarpoq.

Nr. 6-imut 7-imullu

Inuit sakkutuujunngitsut pillugit suliat Eqqartuussiviit Qullersaannut  
naammagittaalliuutigineqartarnerat pillugit eqqartuussisarnermik inatsimmi  
§ 515 malittarisassanik imaqarpoq.

Nunatta Eqqartuussisuuneqarfianit eqqartuussutit  
nalunaarutigineqarsimasut naammagittaalliuutigineqarsinnaanngitsut,  
aalajangersakkap imm. 1-iani takuneqarsinnaavoq. Qallunaat  
eqqartuussisarnermik inatsisaanni kapitali 1 a malillugu,  
Ingerlatitseqqinnissamik aalajangiisartut, suliaq pingaarluinnartutut  
pissuseqarpat, taamaattoq Eqqartuussiviit Qullersaannut  
naammagittaalliortoqarsinnaanera akuersissutigisinnaavaat.

Imm. 1 malillugu naammagittaalliuuteqarnissamik qinnuteqaat,  
eqqartuussutip nalunaarutigineqarnerata kingorna kingusinnerpaamik  
sapaatit akunnerisa 8 qaangiunneranni eqqartuussisuunermit  
tunniunneqassasoq, taannalu qinnuteqaat pillugu oqaaseqaateqassasoq  
aamma Ingerlatitseqqinnissamat aalajangiisartunut qinnuteqaat  
nassiutissagaa, aalajangersakkap imm. 2-ani takuneqarsinnaavoq.  
Qinnuteqaat aamma toqqaannartumik Ingerlatitseqqinnissamik  
aalajangiisartunut tunniunneqarsinnaavoq, taamaattoqarpallu suliaq pillugu  
eqqartuussisuunerup oqaaseqaataa taakku pissarsiarissavaat. Qinnuteqaat  
piffissaliussap taaneqartup kingorna tunniunneqarpat, kisianni  
eqqartuussutip nalunaarutigineqarneranit kingusinnerpaamik ukiup 1-p  
kingorna, aalajangiisartut qaqutigorluinnaq pisumik  
naammagittaalliortoqarnissaa akuersissutigisinnaavaat.

§ 515, imm. 1-imi oqaaseqatigiinni siullerni, ”Kalaallit Nunaata  
Eqqartuussisuuneqarfianit” kingorna “aappassaaneersumik  
suliarinniffiusutut” ilanngunneqassasoq siunnersuutigineqarpoq.

Inatsisissatut siunnersuummi § 1, nr. 3 malillugu inuit sakkutuujunngitsut pillugit eqqartuussivimmi suliassat pingaarluinnartutut pissuseqartut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartut siunissami Nunatta Eqqartuussisuuneqarnianut suliarinneqqaarfiusutut innersuunneqarsinnaanerit pillugu siunnersuummut, siunnersuut atassuteqarpoq.

Eqqartuussutit tamarmik Nunatta Eqqartuussisuuneqarfianit nalunaarutigineqartut, naammagittaalliuuteqarnermi eqqartuussutaapput, tassani Nunatta Eqqartuussisuuneqarfia aappassaaneersumik suliarinniffiusutut aalajangiinermik aalajangiisarluni. Eqqartuussutit Nunatta Eqqartuussisuuneqarfianit nalunaarutigineqartut, naammagittaalliuutigineqarsinnaannginnerat pillugu malittarisassaq atuuppoq, kisianni taamaattoq Ingerlatitseqqinnissamik aalajangiisartut Eqqartuussiviit Qullersaannut naammagittaalliuuteqarnissamik akuersissuteqarsinnaanerit, naammagittaalliornermi suliani eqqartuussutit pineqartillugit, tassani Nunatta Eqqartuussisuuneqarfia aappassaaneersumik suliarinniffiusutut aalajangiinermik aalajangiisarluni, allanngortinnagu ingerlateqqinneqassasoq, § 515, imm. 1-ip allanngortinneqarnissaanut siunnersuutip kinguneraa.

Kisianni eqqartuussutinut inuit sakkutuujunngitsut pillugit eqqartuussivimmi suliassanut pingaarluinnartutut pissuseqartut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartunut, Nunatta Eqqartuussisuuneqarfiata nutaatut suliarinneqqaarfiusutut suliarisassaannut, naammagittaalliornissamut ilaatitaannginneq aamma Ingerlatitseqqinnissamik aalajangiisartunit akuersissummik pinissamut periarfissaq pillugit malittarisassat atuutissanngillat. Eqqartuussutinut taakkununga, inatsisissatut siunnersuummi § 1, nr. 8 malillugu, Eqqartuussiviit Qullersaannut qaqugukkulluunniit naammagittaalliorsinnaaneq pillugu malittarisassaq nutaaq siunnersuutigineqarpoq.

§ 515, imm. 2-mi oqaaseqatigiinni siullerni ”sapaatit akunneri arfineq-pingasut” ”sapaatit akunneri 4”-nik allanngortinneqassasoq siunnersuutigineqarpoq.

Inuit sakkutuujunngitsut pillugit eqqartuussivimmi suliap aappassaaneersumik suliarinniffiusutut Nunatta Eqqartuussisuuneqarfiani eqqartuussutip nalunaarutigineqartup naammagittaalliuutigineqarnissaannut Ingerlatitseqqinnissamik aalajangiisartunut akuersissummik qinnuteqarnermut piffissaliusseq siunissami sapaatit akunneri 4-sut, mannakkut sapaatit akunneri 8-suusut, siunnersuutip kinguneraa.

Qinnuteqarnissamut piffissaliussassatut siunnersuutigineqartoq sivikinnerusoq, sapaatit akunnerinik 4-nik sivilissuseqartoq, eqqartuussutitut inatsisissatut siunnersuummi § 2, imm. 2 malillugu inatsisip atuutilersinneqarnerata kingorna eqqartuussutitut nalunaarutigineqartunut atuutissasoq siunnersuutigineqarpoq. Eqqartuussutitut inatsisip atuutilersinneqarnera sioqqullugu eqqartuussutigineqartunut qinnuteqarnissamut piffissaliusseq suli sapaatit akunneri 8-suussapput, aamma qinnuteqaat inatsisip atuulersinneqarnerata kingorna tunniunniunneqartillugu.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 8-mut

Inuit sakkutuujunngitsut pillugit eqqartuussivimmi suliassat Nunatta Eqqartuussisuuneqarfianit suliarinneqqaarfiusutut eqqartuussutigineqartut naammagittaalliuutigineqarsinnaanerat pillugu eqqartuussisarnermik inatsimmi § 515 a-tut nutaamik aalajangersakkamik ilanngussisoqarnissaa siunnersuutigineqarpoq.

Eqqartuussutit, Nunatta Eqqartuussisuuneqarfianit suliarinneqqaarfiusutut eqqartuussutigineqartut, akuusumit, piumasaqaatini pillugu eqqartuussuummi tamakkiisumik isumaqatigineqanngitsumit, Eqqartuussiviit Qullersaannut naammagittaalliuutigineqarsinnaasut, § 515 a-kkut siunnersuutigineqarpoq.

Inatsisissatut siunnersuummi § 1, nr. 3 malillugu, inuit sakkutuujunngitsut pillugit eqqartuussivimmi suliassat pingaarluinnartutut pissuseqartut, inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqartut, siunissami Nunatta Eqqartuussisuuneqarfianut suliarinneqqaarfiusutut

innersuunneqarsinnaasariaqarnerannut siunnersuummut siunnersuut atassuteqarpoq.

Inuit sakkutuujungitsut pillugit eqqartuussivimmi suliami taamaattumi Nunatta Eqqartuussisuuneqarfiata suliarinneqqaarfiusutut eqqartuussutaa, Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaannut naammagittaalliuutigineqarsinnaasariaqarnera, § 515 a-tut siunnersuutigineqartup kinguneraa. Allakkut naammagittaalliornernut atuuttut assigalugit, eqqartuussut akuusumit, piumasaqaatini pillugu eqqartuussummi tamakkiisumik isumaqatigineqanngitsumit, naammagittaalliuutigineqarsinnaavoq.

Naammagittaalliornerissamut piffissaliusseq aamma naammagittaalliornerup aallartinneqarnissaanut periaaseq pillugit inatsisissatut siunnersuummi § 1, nr. 9 tassungalu oqaaseqaatit innersuussutigineqarput.

Eqqartuussut taamaallaat Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaannut naammagittaalliuutigineqarsinnaavoq. Suliap ingerlanerani Nunatta Eqqartuussisuuneqarfiata aalajangiinerit aalajangigai, eqqartuussisarnermik inatsimmi § 526 malillugu, inatsisissatut siunnersuummi § 1, nr. 10-imi oqaasertaliorneqartoq, taamaallaat Ingerlatitseqqinnissamik aalajangiisartut akuersissuteqarteqqaarlugit aalajangeqqitassanngortinneqarsinnaapput.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 9-mut

Inuit sakkutuujungitsut pillugit naammagittaalliornerit Eqqartuussiviit Qullersaanni suliarineqarnerat pillugu eqqartuussisarnermik inatsimmi § 516 tungassuteqarpoq. Eqqartuussiviit Qullersaanni naammagittaalliornermik suliap suliarineqarnerani allakkut qallunaat eqqartuussisarnermik inatsisaanni malittarisassat, allannguutit pissutsit assigiinngitsuunerisa malitsigisaat allannguutigalugit, atuuttut, aalajangersakkami takuneqarsinnaavoq.

§ 516-imi “suliareqqitassanngortitsinerup” kingorna “aallartinneqarnerata aamma” ilanngunneqassasoq siunnersuutigineqarpoq.

Aamma naammagittaalliuuteqarnermik suliap aallartinneqarnerani qallunaat eqqartuussisarnermik inatsisaat, pissutsit assigiinngissusaasa malitsigisaannik allannguutit allannguutigalugit, atuutissasut, siunnersuutip kinguneraa.

Eqqartuussisarnermik inatsimmi § 515, inatsisissatut siunnersuummi § 1, nr. 6-imi 7-imilu oqaasertaliorneqartut malillugit, Ingerlatitseqqinnissamik aalajangiisartut akuersissuteqarnerisigut Eqqartuussiviit Qullersaannut Nunatta Eqqartuussisarfanit aappassaaneersumik suliarinniffiusutut eqqartuussutigineqartut naammagittaalliuutigineqarneri pillugit sulianut, aamma eqqartuussisarnermik inatsimmi § 515 a, inatsisissatut siunnersuummi § 1, nr. 8-tut oqaasertaliorneqartoq malillugu, Ingerlatitseqqinnissamik aalajangiisartut akuersitinnagit Nunatta Eqqartuussisarfiata suliarinneqqaarfiusutut eqqartuussut nalunaarutigini kuusa pillugu naammagittaalliuuteqarnernut saqqummiunneqartunut tamanna atuuppoq.

Eqqartuussivimmut eqqartuussummik suliarinnissimasumut, naammagittaalliuut pillugu eqqartuussisunut aggeqqusissummik tunniussinikkut naammagittaalliorneq pissasoq, imaappoq qallunaat eqqartuussisarnermik inatsisaanni § 372 malillugu Nunatta Eqqartuussisuuneqarfianut, tamatuma kinguneraa. Naammagittaalliuut pillugu eqqartuussisunut aggeqqusissut eqqartuussutip nalunaarutigineqarnerata kingorna sapaatit akunneri 4 qaangiutsinnagit tunniunneqassaaq, imaluunniit eqqartuussisarnermik inatsimmi § 515 malillugu akuersissummik nalunaarutiginnittoqarsimappat, akuersissutip qinnuteqartumut nalunaarutigineqarnerata kingorna sapaatit akunneri 4 qaangiutsinnagit pissalluni. Eqqartuussutip nalunaarutigineqarnerata kingorna ukioq ataaseq tikillugu naammagittaalliuuteqarnissaq Eqqartuussiviit Qullersaata qaqutigorluinnaq akuersissutigisinnaavaa.

Oqaatsit eqqartuussinermi atorneqartussat tasaanerat kalaallisut danskisullu pillugit, eqqartuussisarnermik inatsimmi § 95, imm. 1 malillugu, naammagittaalliuut pillugu eqqartuussisunut aggeqqusissut suliassanngortitsisup toqqaaneratigut kalaallisut qallunaatulluunniit oqaasertaliorneqarsinnaanera, pissutsit assigiinngissusaasa kinguneraa.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 10-mut

Inuit sakkutuujunngitsut pillugit suliat Eqqartuussiviit Qullersaannut aalajangeqqitassanngortitsineq pillugu eqqartuussisarnermik inatsimmi § 526 malittarisassanik imaqarpoq.

Aalajangiinerit, Nunatta Eqqartuussisuuneqarfianit aalajangiiffigineqartut, aalajangeqqitassanngortinneqarsinnaanngitsut, aalajangersakkap imm. 1-iani takuneqarsinnaavoq. Qallunaat eqqartuussisarnermik inatsisaanni kapitali 1 a malillugu aalajangeqqitassanngortitsineq apeqqummik pingaarluinnartut pissuseqartumik tunngassuteqarpat, taamaattoq Eqqartuussiviit Qullersaanut aalajangeqqitassanngortitsineqarsinnaanera Ingerlatitseqqinnissamik aalajangiisartut akuersissutigisinnaavaat.

Imm. 1 malillugu aalajangeqqitassanngortitsinissamut akuersissummik qinnuteqarneq aalajangiinerup aalajangerneqarnerata kingorna kingusinnerpaamik sapaatit akunneri 4 qaangiunnerini, eqqartuussisuunermut tunniunneqassasoq, taannalu qinnuteqaat pillugu oqaaseqaateqassasoq aamma Ingerlatitseqqinnissamik aalajangiisartunut qinnuteqaat nassiutissagaa, aalajangersakkami imm. 2-mi takuneqarsinnaavoq. Qinnuteqaat aamma toqqaannartumik Ingerlatitseqqinnissamik aalajangiisartunut tunniunneqarsinnaavoq, taamaattoqarpallu suliaq pillugu eqqartuussisuunerup oqaaseqaataa taakku pissarsiarissavaat. Qinnuteqaat piffissaliussap taaneqartup kingorna tunniunneqarpat, kisianni eqqartuussutip nalunaarutigineqarneranit kingusinnerpaamik qaammatit 6-t kingorna, aalajangiisartut qaqutigorluinnaq pisumik naammagittaalliortoqarnissaa akuersissutigisinnaavaat.

§ 526, *imm. 1-imi oqaaseqatigiit pingajuannik nutaamik ilanngussisoqarnissaa siunnersuutigineqarpoq, tamatumalu kingorna itigartitsineq, Nunatta Eqqartuussisuuneqarfianit § 57 a, imm. 5 malillugu aalajangiiffigineqartoq, Ingerlatitseqqinnissamik aalajangiisartut akuersissuteqartinnagit Eqqartuussiviit Qullersaannut aalajangeqqitassanngortinneqarsinnaavoq.*

Inatsisissatut siunnersuummi § 1, nr. 3 malillugu, § 57 a, imm. 5-itut siunnersuutigineqartup malitsigisaanik, Nunatsinni Eqqartuussivimmit inuit sakkutuujunngitsut pillugit eqqartuussivimmi suliap Nutatta



Eqqartuussisuuneqarfianut innersuunneqarnissaata itigartinneqarnissaa pillugu Nunatta Eqqartuussisuuneqarfianit aalajangiineq, Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaannut aalajangeqqitassanngortinneqarsinnaanera, siunnersuutip kinguneraa.

§ 57 a, imm. 5-ip malitsigisaanik innersuussinissamik itigartitsineq pillugu aalajangiineq taamaallaat Ingerlatitseqqinnissamik aalajangiisartut akuersiteqqaarnagit Eqqartuussiviit Qullersaannut aalajangeqqitassanngortinneqarsinnaavoq. Nunatsinni Eqqartuussiviup suliap Nunatta Eqqartuussisuuneqarfianut innersuunneqarnissaa akueriniarnagu aalajangerpagu, aamma aalajangiineq taanna Nunatta Eqqartuussisuuneqarfianut aalajangeqqitassanngortinneqarpat, tassanilu innersuussisoqannginnissaa pillugu aalajangiineq aalajangersarneqarpat, aalajangeqqitassanngortitsinermi Nunatta Eqqartuussisuuneqarfiata aalajangiinera, eqqartuussisarnermik inatsimmi § 526 malillugu taamaallaat Ingerlatitseqqinnissamik aalajangiisartut akuersissuteqarnerisigut Eqqartuussiviit Qullersaannut aalajangeqqitassanngortinneqarsinnaavoq.

Aalajangeqqitassanngortitsineq aamma aalajangeqqitassanngortitsinermi periaaseq pillugit inatsisissatut siunnersuummi § 1, nr. 11 aamma 12, taakkunungalu oqaaseqaatit innersuussutigineqarput.

Aamattaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

Nr. 11-imut 12-imullu

Inuit sakkutuujunngitsut pillugit aalajangeqqitassanngortitsinermik Eqqartuussiviit Qullersaanni suliarinninneq pillugu, eqqartuussisarnermik inatsimmi § 527 tunngassuteqarpoq. Aalajangeqqitassanngortitsinermik suliarinninnerni qallunaat eqqartuussisarnermik inatsisaat, pissutsit assigiinngissusaasa malitsigisaannik allannguutit allannguutigalugit, aammattaq atuutissasut, aalajangersakkami takuneqarsinnaavoq.

§ 527-imi “Aalajangeqqitassanngortitap” kingorna “aallartinneqarnerata aamma” ilanngunneqassasoq kiisalu nutaamik *oqaaseqatigiit aappaannik* ilanngussisoqassasoq siunnersuutigineqarpoq, tamatumalu kingorna aalajangeqqitassanngortitsinermut piffissarititaasoq taamaattoq sapaatip akunneri 4-ngussapput.

Aalajangeqqitassanngortitsinermik suliat aamma aallartinneqarnerannut qallunaat eqqartuussisarnermik inatsisaat, pissutsit assigiinngissusaasa malitsigisaannik allannguutit allannguutigalugit, aamma aalajangeqqitassanngortitsinermi piffissaliussap sapaatit akunneri 4-nngornerannik naleqqussaaneq naleqqussaartigalugu, atuutissasut, siunnersuutip kinguneraa.

Tamanna § 526, imm. 1-imi oqaaseqatigiit aappaat atuuttoq, aamma imm. 2 atuuttoq malillugit, aalajangeqqitassanngortitsinernut Eqqartuussiviit Qullersaannut saqqummiunneqartunut, aamma aalajangeqqitassanngortitsinerni, Nunatsinni Eqqartuussivimmit Nunatta Eqqartuussisuuneqarfianut innersuussinissap itigartinneqarnissaa pillugu § 57 a, imm. 5-itut siunnersuutigineqartup malitsigisaanik (inatsisissatut siunnersuummi § 1, nr. 3), Ingerlatitseqqinnissamik aalajangiisartut akuersiteqqaarnagit § 526, imm. 1-imi oqaaseqatigiit pingajuattut siunnersuutigineqartoq (inatsisissatut siunnersuummi § 1, nr. 10) malillugu saqqummiunneqartunut, atuuppoq.

Aalajangeqqitassanngortitsineq pillugu allakkamik eqqartuussivimmut, eqqartuussiviup taassuma eqqartuussutaata naammagittaalliutigineqartup, imaappoq qallunaat eqqartuussisarnermik inatsisaanni § 393, imm. 2 malillugu Nunatsinni Eqqartuussisuuneqarfimmut, tunniussinikkut aalajangeqqitassanngortitsineq pissasoq, tamanna isumaqarpoq. Aalajangeqqitassanngortitsineq pillugu allagaq ullormit aalajangiinerup aalajangiiffigineqarneranit sapaatip akunneri 4 qaangiutsinnagit pissaaq, imaluunniit, eqqartuussisarnermik inatsimmi § 516, imm. 1-imi oqaaseqatigiit aapat, aamma imm. 2 malillugit akuersissuteqartoqarsimanera qinnuteqartumut nalunaarutigineqarsimappat, nalunaarutigineqarnerata kingorna sapaatit akunneri 4 qaangertinnagit tunniunneqassaaq. Aalajangiinerup kingorna qaammat 6 tikillugit aalajangeqqitassanngortitsisoqarnissaa qaqutiginnaq Eqqartuussiviit Qullersaata akuersissutigisinnaavaa.

Oqaatsit eqqartuussinermi atorneqartussat tasaanerat kalaallisut danskisullu pillugit, eqqartuussisarnermik inatsimmi § 95, imm. 1 malillugu, aalajangeqqitassanngortitsineq pillugu allagaq suliassanngortitsisup toqqaaneratigut kalaallisut qallunaatulluunniit oqaasertaliorneqarsinnaanera, pissutsit assigiinngissusaasa kinguneraa.

Aammattaaq inatsisissatut siunnersuummi nalinginnaasumik oqaaseqaatini imm. 2.2 innersuussutigineqarpoq.

§ 2-mut

Aalajangersagaq inatsisip atuutilernissaanut tunngassuteqarpoq.

Inatsit ulloq 1. juli 2024 atuutilissasoq *imm. 1-imi* siunnersuutigineqarpoq.

Aallaaviatigut immikkut ittumik ikaarsaariarnermi malittarisassiortoqannginnissaa siunnersuutigineqarpoq, aamma inuit sakkutuujunngitsut pillugit suliat immikkut ittumik pingaaruteqarluinnartut aamma inuiaqatigiinnut tunngasumik siunissami pingaarutilimmik kinguneqartussat Nunatta Eqqartuussisuuneqarfianut innersuussisinnaangorneq, aamma suliati, inatsisip atuutilinnginnerani suliassanngortinneqartuni atorneqarsinnaassaaq.

Inatsimmi imm. 1, nr. 7, eqqartuussutitut, inatsisip atuutilinnginnerani eqqartuussutigineqartunut, atuutissanngitsoq, taamaattoq *imm. 2-mi* siunnersuutigineqarpoq. Eqqartuussutitut taamaattunut maannamut malittarisassat atuuttut atorneqassapput.

Inatsisip atuutilernerata kingorna Nunatta Eqqartuussisuuneqarfiata eqqartuussutaa, Nunatta Eqqartuussisuuneqarfiani aappassaaneersumik sularinniffiusutut eqqartuussutip Eqqartuussisut Qullersaannut naammagittaalliutitigineqarnissaanut akuersissummik Ingerlatitseqqinnissamik aalajangiisartunut qinnuteqarnissamut piffissaliussap sivikillineqarnissaanik siunnersuutigineqartoq sapaatip akunnerinit 8-nit sapaatit akunnerinut 4-nut sivikillineqarnera atuutissasoq, tamatum kinguneraa. Eqqartuussutitut inatsisip atuutilinnginnerani eqqartuussutigineqarsimasunut, qinnuteqarnissamut piffissaliussaq suli sapaatit akunnerinik 8-nik sivilissuseqassaaq, aamma qinnuteqaat inatsisip atuutilernerata kingorna tunniunneqarnerani.